

Fenomena alam faktor jumlah balai cerap meningkat

KUALA NERUS - Konsep balai cerap persendirian semakin bercambah di negara ini dengan menyediakan kemudahan minimum untuk cerapan apabila berlaku sesuatu fenomena astronomi.

Pensyarah Ilmu Falak dari Fakulti Pengajian Kontemporari Islam, Universiti Sultan Zainal Abidin (UniSZA), Prof Madya Dr Baharrudin Zainal berkata, fenomena gerhana bulan dan matahari yang turut dapat disaksikan penduduk di negara itu menjadi antara faktor balai cerapan persendirian semakin berkembang.

Menurutnya, inisiatif yang diambil individu tertentu itu secara tidak langsung memberi peluang kepada masyarakat untuk melihat sendiri fenomena yang jarang-jarang berlaku.

"Ini terbukti apabila di Pulau Pinang sahaja terdapat sekurang-kurangnya enam balai cerap persendirian.

"Walaupun kemudahan yang disediakan oleh balai cerap persendirian adalah minimum, namun ia memadai untuk menyaksikan secara jelas fenomena yang berlaku.

"Justeru, saya yakin bahawa konsep cerapan persendirian ini akan terus berkembang dari semasa ke semasa," katanya.



Pelajar bersedia membuat cerapan gerhana bulan penuh.

Menurut Baharrudin, sempena fenomena gerhana bulan penuh paling lama abad ini, awal pagi kelmarin, beliau turut menyediakan ruang khas di atas bumbung rumah untuk dijadikan lokasi cerapan.

"Cerapan ini juga turut disertai seramai 20 pelajar UniSZA yang turut membuat tugasannya khas.

"Turut serta bersama-sama dalam program cerapan gerhana

bulan penuh itu adalah jemaah surau Al-Muttaqin, Sepetir Rendang, Tok Jembal," katanya.

Dalam pada itu, Baharrudin turut memberitahu penduduk Malaysia bakal berpeluang melihat gerhana Matahari anular pada 26 Disember 2019 nanti dan gerhana Bulan penuh seterusnya dijangka akan berlaku ketika waktu Maghrib pada 26 Mei 2021.